

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 2/2011-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata nunani avannarlerni killerni kulturimut naalakkersuisut kaammattorpai filmiliorneq tv-kkullu aallakaatitassiorneq eqqarsaatigalugu nunat avannarliit killiit suleqatigiinnerata annertusarneqarnissaanut periarfissat misissoqqullugit. Alloriarnertut siullertut immaqa ataatsimiititsisoqarsinnaagaluarpoq nunani avannarlerni killerni filmiliornermik tv-kkullu aallakaatitassiornermik ingerlataqartunit peqataaffigineqartumik.

Tungavilersuut:

Nunat avannarliit killiit nunanut allanut sanilliullugu immikkut ilisarnaataasa ilagaat nunaagamik ajasoornaannartumik avatangiiseqarfusut nutaaliorfusumik filmiliorfigissallugit tv-kkullu aallakaatitassiorfigissallugit soqutigintorpassuarnik periarfissiisut. Taamaattorli nunani avannarlerni killerni filmiliornerit tv-kkullu aallakaatitassiornerit killilerujussuupput, ilaatigut pissutigalugu nunani ataasiakkaani filmiliornermik tv-kkullu aallakaatitassiornermi teknikikkut pisinnaasat misilittakkallu annikippallaarnerat.

Nunat Avannarliit Killiit Siunnersuisoqatigiiffiat isumaqarpoq suliassaqarfimmi matumani suleqatigiinnerulerneq nunat pineqartut kulturikkut suleqatigiinnerannut aamma annertuumik tunniussaqsinnaasoq. Suleqatigiinnerulernikkut nunani avannarlerni killerni filmiliornerit tv-kkullu aallakaatitassiornerit misilittakkaminnik ilisimalersimasaminnillu iminnut ilinniarfigisinnaassapput. Taamatuttaaq filmiliornerit tv-kkullu aallakaatitassiornerit eqqarsaatigalugit nunat avannarliit killiit suleqatigiinnerata nukittorsarneqarneratigut teknikkikkullu ilisimasat annertusarneqarneratigut aningaasarsionnissamut periarfissanik aamma nassataqsinnaavoq, assersuutigalugu nunani avannarlerni killerni filmiliornerit tv-kkullu aallakaatitassiat nunanut avannarlernut allanut nunanullu allanut tunineqartarnerisigut.

Nunat Avannarliit Killiit Siunnersuisoqatigiiffiata nunani avannarlerni killerni naalakkersuisut pingasuusut kaammattorpai ataatsimoorullugu ataatsimiinnermik aqqissuusseqqullugit, tamatumani filmiliornermik tv-kkullu aallakaatitassiornermik ingerlataqartut suleqatigiinnerisa annertusarneqarnissaanut periarfissat pillugit ataatsimiinnermut aningaasartuutitut nunat tamarmik tapiissuteqassallutik.